

INFRASTRUTTURE

# Per l'ospedèl se fèsc lèrga la quarta soluzion

*La proponeta de fèr n nef frabricat semper en località 'Dossi' a Ciavaleis la podessa meter a una la doi fazions. L'emportant per l'Procurador e i sanitàres l'è no restruturèr l'ospedèl coi malé laite*



*I prospec de la restruturazion del ospedèl veie te paisc a Ciavaleis e de coche podessa vardèr fora chel nef te la frazion de Masi.*

Va inant la longia storia per l'davegnir del ospedèl de la valèdes de la Veisc, con la speranza che no se rue a na «storia infinita» desche chela del NOT.

L'an passà l'è stat caraterisà dal debatit che à metù de contra i sostegnidores de la restruturazion del ospedèl storich tel paisc de Ciavaleis (en pruma fila l'amministrazione de Comun de Ciavaleis e l'ex assessor provinzièl Mauro Gilmozzi, ades Scario de la Magnifica Comunità) e da l'autra chi a favor de la costruzion del frabricat nef, proponet a Masi de Ciavaleis con n partenariet public-privat.

Chest an la discusion è peèda via ai 10 de jené te n Consei provinzièl straordenèr, olache l'president Fugatti à palesà sia volontà de scutèr i teritories dijan che aboncont i finanziamenc i è segures, coluna che sarà

la soluzion che vegnarà cernù. Te chel Consei provinzièl ampò l'è vegnù fora ence na terza proponeta, portèda dant dal conseier provinzièl fiamac de la Lega Gianluca Cavada: n nef frabricat, ma fat te la località Milon/Porina sul tegnir del Comun de Tieser, olache no l'è vivai de la Forestala e l'è ence più soreie.

Ai 30 de jené tel teater de Tieser l'è stat endrezà na scontrèda con duc i amministradores e i raprezentanc sanitàres de Fascia, Fiem e Cembra, olache l'è stat portà dant la 3 soluzions rejonan di aspec positives e negatives che ogneuna comporta. L'cost de la restruturazion del veie ospedèl è ades cresciù, ruan a presciapèch 75 milions de euro – à dit l'president Fugatti – de contra ai 101 milions per la frabrica de chel nef, aldò de n projet che perveit la gestion e la manutenzion per 6,6



*L'president Fugatti te la scontrèda coi amministradores de la trei valèdes de la Veisc ai 30 de jené.*

milions de euro al an per 18 egn, che portassà l'cost en dut a 283 milions anter frabrica, prum contribut, rates de leasing e paamenc de gestion.

N'autra neva è vegnuda fora ampò pec dis do, canche l'Consei de Comun de Tieser à refudà la

proponeta de Cavada e l'è enveze metù dant na 4<sup>a</sup> ipotesa: fèr n nef frabricat semper en località 'Dossi' sul tegnir de Ciavaleis. Sun chesta neva proponeta se è dit d'acort l'president de la Comunità de Fiem Gianni Zanon e ence de etres à uzà fora aspec positives, enceben che sie semper chi che la contesta soraldut percheche fossa n consum de teritorie.

Ampò l'ospedèl a chesta vida l'restassà sul tegnir de Ciavaleis, te n bel raion soladif, e fossa sori fèr na varianta per ruèr su da la strèda de fon de val senza cogner passèr fora l'paisc. Ma soraldut la schivassà l'problem maor per la restruturazion del veie frabricat, che vegn uzà fora da chi che laora te la sanità e de chel che se à fat portausc ence l'procurador Giuseppe Detomas: «L'emportant l'è che no se peisse de restruturèr

l'ospedèl da ades coi malé laite, ajache chest creassa dalbon na situazion massa pesoca per i malé e per duc i sanitàres.»

L'percors de partezipazion empro-metù dal president Fugatti è jit inant en lunesc ai 13 de firé con na scontrèda tel Palacongresc de Ciavaleis con la popolazion de Fiem, che à fat crescer i dubies su la proponeta del nef ospedèl a Masi. Ades l'è en program na scontrèda ence te Fascia, en lunesc ai 20 de firé da les 20:00 te sala del Consei de Comun de Sèn Jan. Per noscia val l'è prioritèr aer n azes sori e asvelt al ospedèl, ma sun desche l'è ence la costions di servijes sanitàres essenzièi che cogn vegnir arsegurè te val e de maor trasparenza en cont de la Cèsa de la Sanità perveduda ja Pardac.

Lucia Gross